

Месяца июля в 8-й день

Празднование Пресвятей Богородице в честь
иконы Ея, именуемая Песчанская, яже во граде
Изюме.

На велицей вечерни

На Господи возвах: стихиры на 8, глас 4.

Ныне страна наша / о Тебе хвалится и веселится, /
имеючи Тя Заступницу непостыдную / и стену нерушиму, /
граду нашему непоколебимое основание, / стража
неусыпна земли слобожанския. / Непрестай ныне Твоими,
Госпоже, молитвами / избавляти Твой град и люди от всех
бед.

Днесь торжество Твое, Дево, / благоговейно со Ангелы
совершаем, / почитающе Твой честный и священный образ.
/ Веселятся ныне людие богоспасаемого града Изюма, /
благоговейно почитающе богоподобнаго Твоего лика
изображение, / и во умилении взывают: / Всечестная,
Всеблаженная, / Сына Твоего моли о нас, любовью чтущих
Тя.

Ныне страна наша о Тебе хвалится, Владычице, /
имеючи честную икону Твою / яко стену небориму / и
основание непоколебимо, / стража неусыпна и заступление
твердо; / непрестай ныне Своими молитвами / избавляти
рабы Своя от всех бед.

Слезами радости паче жемчуга / икона Твоя, Дево
украшается, / множество плачущих нечаянную радость
обретают, / грешници от внезапныя смерти избавляются, /
молитвами Твоими, Всещедрая.

Дала еси нам залог любви Твоя, Пречистая, / образ
Твой честный и многоцелебный, / имже посрамила еси
неверных мудрования, / верныя же облистала еси Небесного
света красотами, / просвещая и спасая души наша.

Хотяй Спас излияти презельное богатство благодати на
верныя Своя, / разсеял есть, яко звезды, / сияющия во

странах православных, / иконы Матере Своея, / благодать чудес источающия, / исцеления подающия, и мир, и велию милость.

Преславное явление образа Твоего, Владычице, / и многия чудеса, от него бываемая, / удивляют земнородных: / како святителю Иоасафу благоговейну, / в небрежном месте икона Твоя святая / лучезарно сияющи, / явлена бысть благоволением всех Творца, / Егоже моли, Чистая, / в преславном торжестве Твоем / даровати нам просвещение благодатное и велию милость.

Иоасафе, архиерее Христов, радуся и ликуй, / присный рабе Всепетья Богоматере, / яко сподобился еси Тоя всечестную икону / руками твоими подъяти и носити, / и граду Изюму преподати, / якоже многоценное сокровище, во спасение душ наших.

Слава, и ныне, глас 5:

Собравшися, вернии / на священное торжество Девы днесь, / предочистим себе воздержанием страстей, / да Чистую нескверными устнами / и чистыми душами воспоим, глаголюще: / радуйся, преизящная красото и похвало граду Твоему, / емуже присно благотвориши, / ходатайствующи полезная всем, / с любовию к Тебе притекающим.

Вход. Прокимен дне. И чтения три.

Бытия чтение: (глава 28)

Изыде Иаков от студенца клятвеннаго и иде в Харрань. И обрете место, и спа тамо: зайде бо солнце, и взят от камня места того, и положи возглавие себе, и спа на месте оном. И сон виде. И се лествица, утверждена на земли, еяже глава досязаше до небес, и Ангели Божии восхождаху и низхождаху по ней. Господь же утверждашеса на ней, и рече: Аз Бог Авраамов, отца твоего, и Бог Исааков, не бойся: земля, идеже ты спиши на ней, тебе дам ю и семени твоему. И будет семя твое, яко песок земный, и

распространится на море, и ливу, и север, и на востоки; и возблагодарятся о тебе вся колена земная и о семени твоём. И се Аз с тобою, сохраняяй ты на всяком пути, а може аще пойдёши. И возвращу ты в землю сию, яко не имам тебе оставити, дондеже сотворити Ми вся, елика глаголах тебе. И воста Иаков от сна своего, и рече: яко есть Господь на месте сем, аз же не ведех. И убояся, и рече: яко страшно место сие; несть сие, но дом Божий и сия врата Небесная.

Пророчества Иезекиилева чтение (глава 43 и 44)

Также глаголет Господь: будет от дне осмаго и прочее, сотворят иереи на олтари всесожжения вашего и яже спасения вашего, и прииму вы, глаголет Адонаи Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут и не отверзутся, и никтоже пройдет сквозе их; яко Господь Бог Израилев пройдет ими, и будут затворена. Яко Игумен сядет в них снести хлеб, по пути Еламских врат внидет и по пути его изыдет. И введе мя по пути врат святых, сущих к северу, прямо храму, и видех, и се исполнь славы храм Господень.

Притчей чтение (глава 9)

Премудрость созда Себе дом и утверди столпов седмь. Закла Своя жертвенная, и раствори в чаши Своей вино, и угодова Свою трапезу. Посла Своя рабы, созывающии с высоким проповеданием на чашу, глаголющи: Иже есть безумен, да уклонится ко Мне. И требующим ума рече: Приидите, ядите Мой хлеб, и пейте вино, еже растворих вам. Оставьте безумие и живи будете, и взыщите разума, да поживете, и исправите разум в ведении. Наказуяй злыя приимет себе безчестие, обличаяй же нечестиваго опорочит себе: обличения бо нечестивому раны ему. Не обличай злых, да не возненавидят тебе. Обличай премудра, и возлюбит ты. Дажь премудрому вину, и премудрший будет.

Скажут праведному, и приложит приимати. Начало премудрости страх Господень и совет святых разум: разумети бо закон помысла есть благаго. Сим бо образом многое поживеши время, и приложатся тебе лета живота.

На литии стихиры, глас 3:

Приидите, вси концы земли, / честному образу Божия Матере поклонимся: / Та бо, руце к Сыну воздеючи, молится о нас / и Тоя святым образом наша страна оживлена бысть. / Мы же, псалмы и песни духовными / поя Ей со всеми святыми, / празднуем днесь светло.

Утверди прослави, вознеси верныя люди Твоя, / верных Помощнице, / град сей и вся грады и страны в мире сохрани / и всех, любящих славити честный образ Твой, / венцев славы сподоби.

В премирном ликуя свете, / не презри нас, долу сущих во тьме земной, / но, осеняя иконою Твоею, / призри Матерним благоутробием на рабы Твоя, / и Светом Сына Твоего, Владычице, / отжени от нас мрачныя прилоги лукаваго.

Слава, и ныне, глас 6:

Не надеемся на князи, на сыны человеческия, / но все наше упование на Твоего Сына, Богородице, возлагаем / и веруем непреложно, / яко Той есть спасение наше, / и да не постыдимся.

На стиховне стихиры, глас 8:

Да радуются православных собори, / да ликовствует естество, / яко Твоего, Чистая честнаго образа обретение / град Изюм спасается, / раби Твои, от одержавия нужды избавльшися, / Тебе, Чистая, взывают: / радуйся, добрых виновная, / и Заступнице непостыдная, / и спасение душ наших.

Стих: Слыши, Дщи, и виждь, / и приклони ухо Твое.

О Пресвятая Госпоже Владычице, / не забуди нас Твоих раб, / верно поклоняющихся чудотворней Твоей

иконе / и благочестно воспевающих Тя, / избави Госпоже,
от всяких бед и напастей.

Стих: Клятся Господь Давиду истиною / и не
отвержется ея.

Почерпите, человецы здравия душам и телесем, / яко
река бо всем предлежит, икона Девы Богоматере, /
источающи нам чудес струи, и отмывающи омрачение и
страстей сквернения, / и души освящающи верных /
Божественною благодатию.

Слава, и ныне, глас 2:

Се покровительствуемый Тобою град наш, / в радости
Духа празднует / светлый праздник обретения всечестнаго
Твоего образа, / умильно взывает к Тебе: / прииди к нам,
Богоневесто, / и невидимо стани с нами, / вложи пение во
уста наша / и оным предначни торжество.

На благословение хлебов тропарь, глас 4:

О Пречудная, Преблагословенная Мати Христа Бога
нашего! / Лучезарным небесным светом от иконы, Своя
Песчанской / град Изюм и люди сраны нашей Тебе присно
озаряеши. / Руце Свои Пречистыя к Тебе молящим
простираеши. / О Всеблагая, Ты многотекущая река
божественной благодати, / Ты нас под кровом Своим
сохрани, / Сына своего о нас моли и в горний Иерусалим
введи.

НА УТРЕНИ

На Бог Господь: тропарь Богородице, трижды.

По 1-м стихословии седален, глас 4:

Пречистая Твоя икона, Богородице Дево, / врачевство
граду Твоему даровася духовное, / к нейже приходяще,
поклоняемся и чествуем, / от желания сердца целуем,
исцеления благодать почерпающе, / и недуг телесных и
душевных страстей Твоими молитвами свободяемся.

Слава, и ныне, глас тойже:

Владычице Чистая, призри, Богородице, / виждь наших язв болезни, / и умилосердися, Пречистая, и исцели жжения совести, / Твоею милостию орашаючи и вопиючи рабом Твоим: / Азм есмь с вами, и никтоже возможет на вы.

По 2-м стихословии седален, глас 4:

Божественною благодатию осени Господь пречистый образ Твой, Владычице, / и сей яко многоцелебное великое сокровище, граду нашему яви, / слепыя просвещати, разлабленныя укрепляти, / да тако, прославляюще образ Твой, / научимся славити и величати Тя, / сущую Богородицу и Покровительницу жизни нашея.

Слава, и ныне, глас тойже:

Не отрыни, о Милосердная Мати, / слез и воздыханий наших, / но прошения наша милостивно прими, / пред иконою Твоею молящихся людей веру укрепи, / умилением сердца их исполни и крест земнаго жития носить им помози; / елико бо хочещи, можещи.

По полиелеи седален, глас 4:

Аще и едину каплю милости Твоя одождиши ми Всечестная, / невозможет язык мой возвеличити, / но паче меры и неизреченна есть благодать Твоя, / и пою славу Твою, / яко воистину Мати Божия Ты еси.

Степенна, 1-й антифон 4-го гласа. Прокимен глас 4:
Помяну имя Твое / во всяком роде и роде. Стих: Отрыгну сердце мое слово благо, глаголю аз дела моя Царевн. Всякое дыхание: **Евангелие от Луки, зачало 4.**

По 50-м псалме, стихира глас 6:

Да радуется с нами все Вышних ликостояние / и да играет вся тварь, да веселятся собори верных, / яко всех Зиждителя Мати, / Царица сущи небеси и земли, / являет нам неизреченное благоутробие / целебными Своего образа чудесы, / подаючи слепым прозрения, / возставляци разлабленныя, / свободяющи от злых духов томимыя / и спасаеши в мире души наша.

Канон Богородице со ирмосом на 14, ирмос по дважды, на 12. Глас 4.

Песнь 1

Ирмос: Отверзу уста моя, / и наполнятся духа, / и слово отрыгну Царице Матери, / и явлюся светло торжествуя, / и воспою радуяся Тоя Чудеса.

Сердца наша привлекла еси, Дево Чистая, / и тайным образом Твоего благолепием, / и боголепными оногo чудесы, / Темже, поюще, молим Тя: / и наша души благообразны соделай Владычице.

Яко живу Матерь Слова видеv Тя народ многочисленный, / исцелений множеству показавшу, / и обстояще Твою всечестную икону со священным собором, руке воздеvше к высоте, / моляхуся Тебе призывающе на помощь.

Надежду имуще на Тя, Богородительнице, и несумненну веру, / града сего народи / Тебе граду забрало положиша, Дево Неискусобрачная.

Водою молитв Твоих, Дево, ороси нас к плодоносию духовному / и воспламени хладное наше сердце Божественною любовью, / да Тебе, Богородительнице, / пение хвалебное воспоим достойно, Чистая.

Воды страстных помышлений обуревают нас, Госпоже Всеблагая, / но инаго пристанища ко спасению не имамы, / токмо Тебе, Всенепорочная, / и от иконы Твоея святыя всем дарующая утешение.

Отверзи нам душевныя очи Богородице и Мати Света, / слепотою греховною недугующим, / и во свете повелений Господних ходити направи нас, / да радующеся, воспеваем Твоя к нам милости и чудеса.

Песнь 3

Ирмос: Твоя песнословцы, Богородице,/ живой и независтный источниче,/ лик себе совокупльшия духовно утверди/ в Божественней Твоей славе,/ венцев славы сподоби.

К Тебе притекаем, Пречистая, / не презри наша болезнь и воздыхания, / но призри на нас, сущих в скорбех, / и сию нашу печаль на радость преложи, Богоблаженная.

Милостивным и кротким Твоим оком Богородительнице, / зрящи мя во обстоянии и скорби одержима, вскоре свободи, / Тя бо призываю на помощь.

Божественныя Твоя иконы святое явление, Богородице Дево, / яко светозарное возсия нам солнце, преславных чудес лучи пущающи, / тьмы лютых обстояний отгоняющи священными Твоими, Владычице, молитвами.

Горьким плачем моим, яко воду, излию сердце мое, / сокрушение мое яко жертва Тебе, и молю Тя, Пречистая: / ей не отврати мене, раба твоего, / сохрани убо и до последнего дне.

Ума моего просвещение, воли слабыя укрепление, / сердца унылого радование Ты еси, Препоблагословенная, / молю Тя усердно: / вся силы души моя обнови.

Изглади грехопадения юности, / прими покаяние старости моя, Богоблаженная, / се бо от чрева матере моя даже донныне враг не отступает, не попусти мя творити похоти его, / но узы греховныя разреши и помилуй мя.

Седален, глас 8:

Величия Твоя кто исповест, Богородице? / прославлением бо чудотворныя иконы Твоя Песчанской / возвеселила еси души православных, / многия недуги тою врачующи и от всяких бед избавляющи, / иже по Бозе упование на Тя возлагающих, о Владычице, Всемиостивая, / и нас Твоего заступления не лиши, град наш от всякого зла сохрани, / да, Тобою хвалящися, непостыдимся во веки.

Песнь 4

Ирмос: Седяй в славе/ на престоле Божества,/ во облаце легце,/ прииде Иисус пребожественный,/ нетленною дланию, и спасе зовущия: / слава, Христе, силе Твоей.

Ты еси, Пречистая Дево, сущим в бедах прибежище, / немощным помогаеши, грешных исправляеши / и ко спасению наставляеши, яко Мати Божия сущи.

Преславную Твою Матерь, Христе, прими молящуюся о мире, милостивно Тебе зовущую: / Сыне Мой, прими мольбу Мою и утиши гнев,лежащий земли.

Надеждо ненадежных, помощнице сирых, / плачущих утешение, согрешающих очищение, / Руководительнице заблудших, болящих Целебнице и исправление падающих, / Владычице спаси рабы Твоя.

Зряще на Твою, Всечистая, икону, / молим Тя, яко Матерь Света: / отжени от нас мрак страстей Того светлостию, да, просвещшися, воспоем: / слава силе Твоей, Господи.

Что Ти принесем, Богомати, / яко град наш Изюм освятила еси / Твоим дивным явлением? / Егоже ныне воспоминающе, / благодарно славословим Тя.

В божественном храме Твоем, Всечистая, / идеже чудотворная Твоя икона поставлена бысть, во утверждение богохранимому граду нашему, / совокупльшися, Тя прославляем.

Песнь 5

Ирмос: Ужасошася всяческая/ о Божественней славе Твоей;/ Ты бо, неискусобрачная Дево,/ имела еси во утробе над всеми Бога,/ и родила еси безлетного Сына,/ всем воспевающим Тя/ мир подавающая.

Душу мою сохрани, яко зеницу ока, под кровом крилу Твоею, Благая Пречистая, / и от духов лукавых томления и мучения избави.

Не якоже к тому образно в гаданиях священный ковчег Завета носим есть, / икона бо Божия Матере священными руками святителя Иоасафа честно на достойное место в церкви поставлена бысть.

Тайны грех моих обличение ужасает мя, Пречистая, / но ничтоже возможно утаити от Всевидящаго Ока, / все прибегаю к Твоему милосердию, / даждь ми силу к покаянию и Твоими моливами покрый мою наготу.

Тя богатство неистощимое имуще и сцелений источник/ верою прибегающей к храму Твоему, / идеже пребывает честный образ Твой, Владычице.

Храм Твой, Дево, яко рай другой показася ныне, / древо жизни имея икону красоты Твоя, / юже вси усердно со благоговением и любовью целуем.

Тобою возстают разслабленнии, недугующии исцеляются, / слепии прозирают, от бесов томимии свободяются, / радуйся, Источнице дарований Пренепорочная Дево.

Песнь 6

Ирмос: Божественное сие и всечестное/ совершающе празднество,/ Богомудрии, Богоматере,/ приидите руками воспещим,/ от Нея рождагося Бога славим.

Болящих Целительницу, падающих востание, согрешающих очищение, Богородице, / Тебе молю со слезами припадаю и зову Ти: / яко сильна Сама мя спаси, погибающаго.

Целения болезни отгнание же страстей и душепитательное спасение, / грехов прощение и вечное избавление от Пречистыя Твоя иконы, Владычице, / верно приходяще, приемлем, Богомати Всенепорочная.

Воздыхания тяжкое слышиши, Препоблагословенная, / скорбь сердца моего ведещи, / миро утешения и вино веселия возлей на раны душевныя, / мрак уныния прогоняющи.

Молитвенно Тя славим, Пречистая, / и, с любовью припадающе к многоцелебному Твоему образу, сердцем и усты сей целуем, / видяще в нем залог благодатный Твоего к нам матерняго благоволения.

Слава иконы Твоя, от храма Вознесения, / озаряюще не токмо землю слобожанскую, / но и многия иныя дальныя грады достигоше, / сего ради вопием Ти: / радуся, всея земли наша похвало.

Не стяжахом на земли иноного утешения и крепкаго заступления, / разве Тебе, Всеблагая, / покрый убо от всякого зла любовью воспевающих Тя.

Кондак, глас 3:

Дева днесь предстоит Сыну, / руце Свои к Нему простирающи, / святитель Иоасаф с множеством верных радуется, / и с ним град Изюм и страна наша торжествует, / нас бо ради молит Богородице Превечнаго Бога.

Икос

Очисти и возвыси моя помышления, Пречистая, / и Небесным Твоим благословением / подвигни мя достойно воспети славу Твою на месте святем сем, / да, надеяся на милость Твою, дерзну воззвати к Тебе: / радуся изюмская славо, от лет древних нас освящающая, / радуся упование и крепость рабов Твоих, на месте сем служащих Ти; / радуся, незримо нас благодатию осеняющая в образе Твоем, / град Изюм укрепляющи.

Песнь 7

Ирмос: **Н**е послужиша твари богомудрии/ паче Создавшаго,/ но огненное прещение мужески поправше,/ радовахуся поюще:/ препетый отцев Господь и Бог, благословен еси.

Град Изюм и страну нашу Твоим омофором, Честная, присно покрый / и мольбу нашу горе вознеси к Сыну и Богу щедрот, / да славим Тя вси, Преблагая.

Людем Твоим, Госпоже, земли устройства зрети, /
мудрость в правителях, суд правый сподоби, / да вси в мире
всегда проживем вопиючи Ти: / миру всему Надеждо и
Упование.

Ты еси струи жизни источившая человеком, / даждь ми
от воды Твоея, Дево, во иссушение моих согрешений / и
ороси, молюся, мой ум, сердце и помысл, Едина Всепетая и
Благословенная.

Неисчерпаемый источник дарований священных
показывается / Всемиловитая икона лика Твоего, / всему
миру благодать посылаючи.

Не предаждь в руки врагов наследие Твое, Чистая, / да
некогда рекут: / где есть Богородительница, на Нюже
уповаша? / но невредимом соблюди стадо Твое.

Не стяжахом на земли иного утешения и отрады, / разве
Тебе, Владычице, / покрый убо от всякого зла любовию
чтущих Тя.

Песнь 8

Ирмос: Отроки благочестивыя в пещи/ рождество
Богородичо спасло есть:/ тогда убо образуемое,/ ныне же
действуемое,/ вселенную всю воздвизает пети Тебе:/
Господа пойте дела,/ и превозносите Его во вся веки.

Убояхся помощи человеческия искати, / прибегах к
Тебе, Всенепорочная, / Ты еси Хранительница христианам, /
днесь к покрову притекохом, надеясь на милость
благоутробия Твоего: / матерски помилуй нас, да славим Тя
во веки.

Прими песнь от наших худых устен, Богородительнице,
вопиющих Ти: / радуйся, болящим телесем врачевство и
отчаянным душам спасение.

Любомрачное око мое просвети светом
смиреномудрия Твоего, / и познаю волю Сотворившего
меня,/ и не от мудрования моего, но сердцем моим воскликну
о Нем: / Господа пойте и превозносите во вся веки.

Волны неверия и скорбей лютых покрывают мою душу, / но слышу глас Господа, глаголюща: / маловерный, по что усумнился еси? / К Тебе прибегах, Мати Божия, / спаси мя, / в Тебе бо утверждение веры имама, / да превозносим Господа во вся веки.

Невозможно есть малою слезою великия скверны омыти / и огонь геенский угасити, / о Всемиловитая Мати, / вижду ожесточение мое и молюся Ти: / даждь ми слезы покаяния, / да убелю одияния души моя и превознесу Христа во вся веки.

Освяти, Всесвятая, благоговейно лобызаючи святую икону Твою / и Твоим матерним дерзновением милостива нам твори Сына Твоего, / да поем Его во веки.

Песнь 9

Ирмос: **В**сяк земнородный/ да възиграется, духом просвещаемь,/ да торжествует же безплотных умов естество,/ почитающее священное торжество Богоматере,/ и да вопиет:/ радуйся, Всеблаженная,/ Богородице чистая Приснодево.

Уловлен радостию в сей светлый день праздника Богоматере, / все упование на Ню возложим в скорбех и печалех жизни нашея.

Воистину залог благодатный явися святая Твоя чудотворная икона, / Богородице Преплагая, / на нюже взирающе, сияния Божией благодати в души наша невидимо приемлем / и по долгу песньми хвалебными Тя величаем.

Воистину щит и покров граду нашему святая икона Твоя дадесе, / Пресвятая Дево, / сию убо с любовию объемлюще, сердцем и усты целуем / и Тя, непрестанно величаем.

Оком милосердным Твоим свыше призри на град и люди Твоя, Пречистая, / иныя бо помощи не имама, токмо Тебе, Всенепорочная, / да Тя вси, яко Матерь Божию, непрестанно величаем.

Милосердная Мати! / в молитву приведем Тебе / святителя Иоасафа, и всех святых в земли слабожанской просиявших, / их же предстательством / присно покрывай нас в житии сем, / сподоби же и нас невечернего дне / во Царствии Сына Твоего.

Молишися за всех яко Милосердная Мати, / стране нашей подаждь благоденствие, мир спасение / и на враги видимыя и невидимыя одоление.

Светилен.

Светом озаряется вознесенская церковь от пречудного лика Твоего, Богородице, / да верою и любовью славим Тя, Пречистая.

На хвалитех стихиры, глас 6:

Величаем Тя, Мати Пренепорочная, / обретением бо иконы Твоея место сие освятися, / страна и град наш благодати и веселия исполнися. / Темже молим Тя: / неотступай от нас Владычице, / но присно спасай воспевающая Тя.

Светло красуется град Изюм, / образом Твоим хвалится, / от негоже источаеши верным исцеления / и всякую скорбь и недуг отгоняеши. / И нас во Царствии Сына Твоего / сподоби вечныя радости.

Совершая сей честный праздник Богоматере, / да небудем, братие, яко медь звенящи / или кимвал звяцай, / но да верою живою / и любовью ликовствуем днесь: / Темже вся, яже глаголем или деем днесь, / во славу имени Всемиловитвыя да совершаем.

Радуйся и ликуй граде Изюме, / и веселися святителю Иоасафе, / яко некогда обретесе всечестный образ Богоматере, / яко от язв душевных и телесных врачующей / и незримо чудодействующей ко всем верою чтущих Ю / и образу Ея кланяющимся.

Слава, и ныне, глас 2:

Приидите вси вернии, / праздник всесвятый составим / и песньми духовными воспоим Приснодеву, / яко от иконы Ея святыя, / нарицаемая Песчанския, / заступление граду Изюму явися, / тем же воспевает Тя, Владычице, / яко Ты еси Заступница всему миру христианскому / и Ходатаица о всем роде человечестем.

**Славословие великое. Тропарь. Ектении. И отпуст.
На Литургии.**

**Блаженны от канона, песни 3-я и 6-я. Прокимен, глас 3.
Песнь Богородицы: Величит** душа Моя Господа, / и возрадовася дух Мой о Бозе, Спасе Моем. **Стих: Яко** призре на смирение Рабы Своея, се бо от ныне ублажат Мя вси роди. **Апостол к Филипписиим, зачало 240. Аллилуия, глас 8; Слыши, Дщи, и виждь, и преклони ухо Твое. Евангелие от Луки, зачало 54. Причастен: Чашу спасения прииму, и имя Господне призову.**